

gustav / February 02, 2013 08:40PM

[《文昌帝君孝經》](#)

《文昌帝君孝經》(柳真君訂正本)

《文昌帝君孝經》(乾隆壬戌歲柳真君奉文帝命訂正改本)

親恩章第一

帝君曰。天地網緼。萬物化醇。惟人之生。最秀而靈。父生母育。成形受氣。兩大功能。一小地。世人不孝。罔念親恩。吾今明闡。以醒眾心。乾坤鼓物。不憂不勞。父母生子。極憂極勞。自妊及誕。自弱迄強。心力所注。靡有或忘。懷胎十月。呼吸相通。屈伸轉動。受累無窮。臨盆痛楚。人鬼攸分。母瀕於死。子始獲生。筋骨損傷。淋漓惡露。一月暗居。不遑假寐。亂哺懷抱。惟恐不調。睡令安寢。戒勿動搖。自處於濕。移子於乾。曲身護持。不敢圖安。痘疹關煞。憂危驚悸。日夜撫摩。寢食俱廢。憂其不壽。防維恐後。藥餌扶持。祈神保佑。呬唔解語。匍匐學步。手不釋提。心不釋護。見其嬉戲。多方博趣。一出一入。懼其顛墮。知識方開。諄諄教誨。愛之必勞。冀其出類。成童弱冠。謀及終身。授以職業。結以婚姻。難至壯年。恤若孩提。食畱子食。衣畱子衣。子若有疾。甚於己疾。願以身代。只求子吉。子若遠遊。夢寐懷之。踰期不至。斷腸裂眚。子有寸長。稱許歡愛。子有過失。回護遮蓋。子果賢智。慶其有濟。恐其自棄。子果庸愚。憂其難扶。冀其勉諸。子若妄為。懼其蹈危。祝其心回。恩斯勤斯。語言莫聲。事可畧述。心實無盡。貴賤雖殊。親心無殊。貧富雖異。親心無異。聖凡不同。親心則同。普天匝地。親心遍之。亘古及今。親心綿之。如乾覆物。如坤載物。人子念此。淚灑盈斛。

體親章第二

為子之心。親曲體之。為親之心。人孰體之。以親體我。還體親心。我昔思食。親知我饑。以飼我者。體親之腹。我昔思衣。親知我寒。以衣我者。體親之身。我昔趨步。親懼我蹶。以顧我者。體親之行。我昔呻吟。親虞我疾。以保我者。體親之寢。體親衰老。比吾穉弱。體親憂樂。比吾笑啼。體親不言。比吾未語。每作一事。思以慰親。每發一言。恐以拂親。出必告親。親知我出。入必面親。親知我入。責我不楚。哀親力薄。嗔我聲微。哀親氣弱。親若有善。我將順之。親或有過。我幾諫之。親在一日。得養一日。富貴貧賤。各竭其力。必敬必誠。先意承志。加餐則喜。減膳則懼。一當有恙。中心皇皇。衣不解帶。藥必先嘗。幸而獲愈。加意調治。溫飽以節。起居以時。倘或不痊。至心禱祝。如可代兮。願以身贖。不幸長逝。抱憾終天。音容杳矣。笑語茫然。錦繡誰衣。甘旨誰食。生未盡歡。追悔何及。衣衾棺槨。厚穴佳塋。極力自盡。不畱餘情。設主建祠。朝夕焚獻。享祀春秋。物隨時薦。親去雖遠。心覺猶存。尋聲覓跡。若見若聞。嗟爾人子。縱能如是。擬之親心。未及萬一。何乃世人。先身後親。又其甚者。愛身忘親。自能謀食。不顧親食。自能謀衣。不顧親衣。愛女嬌兒。視若珍奇。不念昔者。親亦如斯。推兄諉弟。互分彼此。若無兄弟。親將誰倚。親於子事。纖悉縈情。子於親務。祇以口承。親於子身。縈擾夢魂。子於親體。但以耳聞。親稍怒罵。言不相下。親稍鞭朴。憾深入骨。貧苦怨親。富貴驕親。親思悅子。反為順承。親病延綿。倦於服事。謂久病者。原無孝子。親一奄逝。謂老宜死。不生悲痛。反致欣喜。抔土未乾。視若野墳。寸木未舊。蒙垢蒙塵。一或貧困。發塚移骸。以親朽骨。為名利階。甚而慘惡。焚化親屍。夫人雖死。心猶未死。過七七日。心形始死。心形雖死。心靈猶存。燒筋炙節。煎熬心靈。跳躍不已。痛苦難名。子孫為虐。神天莫遏。形為灰燼。魂亦飄泊。哀哉痛哉。於人且慘。況我親哉。種種大逆。天不覆之。地不載之。萬劫受罪。誰能脫之。

辨孝章第三

人欲盡孝。當先辨孝。養親口體。未足為孝。養親心志。始足為孝。外貌承順。未足為孝。寤寐網繆。始足為孝。奉行故事。未足為孝。艱險不辭。始足為孝。孝之道大。孝之途寬。孝之量廣。孝之事全。生我之母。我固當孝。嫡繼庶母。我亦當孝。母或過黜。母或下堂。雖與父絕。我豈可忘。恩育父母。雖非生我。命所由立。何非生我。兄弟姊妹。一體所遺。若有參商。於孝有虧。伯叔宗族。一本所出。若有乖戾。於孝有拂。高曾祖考。親所敬承。倘失享祀。悖親孝心。後裔子孫。親之嗣脈。倘失教養。敗親慈德。我有家室。親為我娶。和敬不敦。親心不豫。我有子姪。親視之一。區別念生。親心隱戚。我有姻婭。我有鄉鄰。不能媿睦。致親孤鶩。我有師長。我有友朋。不能敬信。貽親怨恫。上而君公。下而民物。不能致澤。損親福祿。吾親戴天。孝必敬天。吾親履地。孝必敬地。日月星斗。照臨吾親。風雨露雷。養育吾親。山川神祇。護佑吾親。無敢褻越。斯為孝親。黍稷稻粱。所以養親。桑麻布帛。所以衣親。皮革羽毛。所以資親。無敢暴殄。總以孝親。聖賢仙佛。親所愛敬。我亦愛敬。奸邪匪僻。親所嫉惡。我亦嫉惡。我孝父母。知過不改。豈孝父母。我孝父母。見善不為。豈孝父母。孝本天命。率性以行。無事勉強。不學而能。讀書明理。因心率愛。因心率敬。孝道自在。愚夫愚婦。不雕不琢。無乖無戾。孝理自若。推類盡餘。因愛及愛。因敬及敬。孝義無遺。

守身章第四

欲體親心。當先守身。未有吾身。誰為生身。既有吾身。誰為育身。一膚一髮。或有毀傷。親心隱痛。子心何當。古昔聖賢。戰戰兢兢。保厥四體。惕若淵冰。行不蹈險。立不臨危。生則全受。死則全歸。既保其形。復全其理。形存理亡。雖生猶死。一身之內。心為天君。戒爾意業。斯可對親。耳聽必聰。目視必明。手不妄動。足不輕行。身律聲度。周規折矩。無忝所生。不負所予。刻薄不形。守身之仁。奸回不事。守身之義。傲慢不起。守身之禮。破其錮蔽。智所自具。黜其虛浮。信非外求。和順積中。光輝發外。靜有主持。動有倚賴。聲不亢厲。氣不粗暴。舉止雍容。顏色光耀。孝男端方。孝女貞靜。孝子溫恭。孝婦柔順。習久自然。還復性天。疾病不染。氣象萬千。三尸諸厭。亦化為善。凡有作為。悉稱其願。其或事君。克致其身。忠本於孝。所以顯親。患難相遇。捐軀赴義。損親形體。聚親浩氣。凡為人子。當守其真。既守其真。當守其心。既守其心。當守其形。愚夫愚婦。無所作為。耕食織衣。體不敢虧。何爾聰明。昧性忘身。沉溺慾海。喪厥天真。負厥鞠育。辜彼生成。身不能守。何以孝親。

敬孝章第五

孝自性具。人孰無之。氣拘物蔽。習染俗移。愚既罔覺。智亦誤用。漸乖漸違。罪深孽重。聖賢仙佛。悲憫凡民。教之為善。首在孝親。爾諸孝子。推己及人。教之之道。使自問心。孩提之愛。良知良能。以茲孺慕。胡弗終身。知識甫開。氣質用事。端厥蒙養。入孝是示。扇枕懷橘。懿行堪述。時與講明。心口往復。根為之深。蒂為之固。嗜慾縱起。真性如故。妻子雖重。使為親重。富貴何切。使為親切。其或孝衰。問其明發。明發不昧。由茲可達。甚至忤逆。責之無益。動以天良。使之自泣。兄弟教孝。友恭斯盡。夫妻教孝。室家和順。朋友教孝。朋友斯信。君臣教孝。堂廉有慶。君民教孝。禮達分定。為人之師。無所不教。教學教問。學孝問孝。教之以道。孝即是道。教之以德。孝即為德。教之以易。孝則占吉。教之以詩。蓼莪可思。教之以書。君陳可讀。教之以禮。先敬吾親。教之以樂。先和吾親。教之春秋。誅彼無親。天文何文。孝為天文。人文何文。孝為人文。惟孝為文。教所當循。教一人孝。作一百功。教十人孝。作一千功。教百人孝。作一萬功。以己之孝。及人之孝。以人之孝。廣己之孝。孝教一家。一家斯齊。孝教一國。一國斯治。孝教天下。天下斯平。

孝感章第六

吾證道果。奉吾二親。昇不驕境。聚首歡心。玉真慶宮。逍遙自在。吾今明闡。大眾有賴。虞舜遭變。化惡為善。帝堯聞知。大位以禪。孔聖神靈。孝經告成。赤虹有降。萬代常明。董永賣身。仙女成親。郭巨埋兒。天賜黃金。王祥養母。鯉躍出冰。種種孝感。人豈不聞。惟天愛孝。惟地成孝。惟神敬孝。惟鬼畏孝。孝可格天。孝可動地。孝可感人。三才化成。不孝之子。百行不錄。盡孝之子。萬罪可贖。不孝之子。天地咸疾。魔纏禍侵。雷霆誅殛。盡孝之子。鬼神護之。水難出之。火難出之。刀兵刑戮。疫癘凶災。毒藥毒蟲。冤家謀害。一切厄中。處處佑之。凡諸福祿。一一畀之。庭集瑞氣。戶起祥烟。祖宗血食。子孫延綿。親生怡悅。親歿安寧。生享福祿。歿能超昇。地獄沉苦。重重解脫。高曾遠祖。咸登極樂。三十六天。靈爽活潑。七十二地。永無墮落。上天斗中。有孝弟王。下有孝子。交映輝煌。精貫兩儀。氣協四時。九垓胥慶。萬象咸熙。

孝子文印詩

至文本無文。韞之孝道中。發見自成章。精彩燭蒼穹。天聾與地啞。非啞亦非聾。特將天地祕。使人自會通。朱衣與魁神。變換文人心。遇彼不孝子。明者使不明。遇彼純孝子。不明使之明。文章有神授。去取豈由人。今生即現報。前生今世報。今生未報者。後世無不報。文章作證明。惟孝有光耀。

孝子桂苑天香心印詩

蟾宮桂一株。挺出乾坤秀。運會初開時。精華月府受。古幹蒼龍老。嫩葉仙株幼。

層層妙蕊開。疊疊寶光覆。花散人寰中。香通帝座右。名之為金粟。載之在奎斗。

珍貯慶宮中。高站壁樓頭。不是擎元叟。莫得主其有。若非植善手。莫得攀茲秀。

不與輕薄子。必以孝為首。孝子之所為。我當賞錫厚。千祥凝聚處。早把天香授。

果是誠孝子。不求而自受。不孝不弟人。求攀終莫有。變孝災行逆。有必奪其有。

悔逆猛從孝。無仍賜其有。須知天上珍。原為孝子酬。祈遊桂苑者。宜認此來由。

中間莫入岐。自有非常邁。闔闔宮殿開。曲折任遨遊。廊檻列雲章。几筵鋪錦繡。
旌羽舞繽紛。笙簧鳴節奏。華彩難罄述。美麗不勝收。灼灼第一枝。高折不居後。
仙真笑相迎。凡夫曷能觀。雲生步履間。香襲衣裳透。畧嗅雲霄桂。洗盡塵俗垢。
千孔與百竅。感香俱靈牖。心腑皆充滿。福緣無不湊。寶哉勿輕錫。慎重待孝友。
又說讚曰

純孝本性生。無不備於人。體之皆具足。踐履無難循。以此瞻依志。無忝鞠育心。
在地自為紀。在天即為經。生民安飲食。君子表言行。人人若共遵。家國賀太平。
放之充海宇。廣之塞乾坤。孝行滿天下。塵寰即玉京。說讚未畢。聲周三界。
慧日藹風。一時擁護。爾時有朱衣真君。恭敬稽首。深會妙旨。演為慈孝鈞天。
大羅妙樂。以廣聖化。爰命金童玉女。著五色霞衣。按歌奏曰。教孝有傳經。
奏愷成聲。母慈昱昱。父愛甄甄。子色循循。妻婉婉。夫閭閭。兄秩秩。弟恂恂。
姑仁媳敬承。父攜子。子攜孫。恩勤。室藹藹。家溱溱。俱是父母一般心。
樂衍衍。何地不生。至性中。篤實天情。懽騰。普天下億兆馨蒸。氣洽門屏。
俱如家人父子一般心。有身有親。始信有君有臣有民。師弟良朋。咸歸於貞。
邦家總孝成。願人生。過去父母。蚤生紫庭。現在父母。祺祿享遐齡。化遍乾坤。
中和瑞凝。九光雯。百和音。漠漠天鈞。融融六宇聽離鳴。並坐長春。並聽鸞笙。
直上瑤京。達帝聞。爾時樂舞三尋。天龍鳳族。聲和翔集。眾籟騰空。香花圍繞。
帝君喜悅。手舉如意。更示大眾。我方演教。宣揚妙道。慈孝感洽。化應勳徵。
遂如是觀。眾等寶之。是經在處。經藏可鎮。壓諸魔惡。可概萬行。誦是經時。
祥光繞室。神仙胥聽。身體力行。有感必應。成大羅仙。超凡入聖。善哉善哉。
諦聽吾言。於是朱衣魁星。天聾地啞。及諸仙真。歡喜踴躍。命諸掌籍。
載之玉冊。信受奉行。

讚曰

至孝真銓。元皇妙傳。得自身體力行間。尊科修奉。福祿綿延。譬冕裔星聯。

南斗文昌元皇道君（三稱九拜）

出自：呂祖全書之廣化真經

※引自 : <http://hi.baidu.com/djshanshu/item/0cdf343c1193405981f1a7d9>

Edited 1 time(s). Last edit at 02/02/2013 08:43PM by gustav.
